


宋宰輔編年錄



宋宰輔編年錄卷之四

宋太常博士徐自明著

仁宗乾興元年

壬戌

六月癸亥丁謂罷相

自司徒兼侍中降授守太子少保分司西京

制曰上宰之司財成於百度大臣之舉規正於四方其或履道有虧脩身寡慎比周非類玷辱具瞻當我至公之朝難居驥假之任具官夙承委遇遂極顯榮而罔念圖猷密交孽寺致山園之擅易曾靡敷陳形簡札以潛通備彰款昵私營噐用竊役工徒證左甚明違辟斯顯宜從黜免用肅群倫俾降秩於春坊仍

分曹於洛邑猶存進退之禮且示含容之懷噫威實
自貽智不慮遠未爲竄逐無忘省循

謂自天禧四年七月拜相十一月戊辰同李迪
罷次日復相至是年六月罷相真宗踰年相仁
宗纔四月○是歲二月戊午仁宗卽位以皇帝
尚幼軍國事兼權取皇太后處分初丁謂與內
侍雷允恭協比專恣內挾太后同列無如之何
太后嘗以上卧起晚令內侍傳旨欲獨受群臣
朝謂力陳其不可由是稍失太后意又嘗議月
進錢充宮掖之用太后滋不悅允恭旣下獄王

曾欲因山陵事併去謂而未得間一日朝退曾
獨對具言謂包藏禍心令允恭擅移皇堂於絕
地太后大驚欲誅謂馮拯進曰謂固有罪然帝
新卽位亟誅大臣駭天下耳目且謂豈有逆謀
哉第失奏山陵事耳太后少解令拯等卽殿隅
議降黜之命任中正言謂被先帝顧托雖有罪
請如律議功曾曰謂以不忠得罪宗廟尚何議
邪乃責謂爲太子少保分司西京故事宰相罷
免皆降制時亟欲行止召當直舍人草詞仍勝
朝堂布諭天下謂所坐但私庇允恭不忍破其

妄作未必真有禍心也然天資險狡多陰謀得政歲久要不可測雖曾以計傾之而公論不以爲過也長編○章獻太后權處分軍國事謂潛移中官雷允恭俾傳達中外之議旣而允恭擅移皇堂事竅謂規庇允恭依違不決仁宗與章獻坐承明殿召馮拯等諭曰丁謂身爲宰相與允恭交結併出文字一紙乃謂託允恭於後苑作酒器及出允恭欵干謂求皇城司簡札往還遂亟命黜謂先是女道士劉德妙詐作降神眩惑禁中謂使詐爲神言譽已又嘗授德妙頌題混

元皇帝賜德妙他日奏之盡得其狀貶崖州司

戶

謂貶崖州司戶勅曰無將之戒舊典甚明不道之辜

常刑罔赦苟露挾邪之迹宜申去惡之文具官早踐

台司備隆朝眷曾靡圖於爲報乃公肆於非心昵彼

妖巫館于私舍潛通詭計假託神靈與孽寺以連謀

幸先皇之遺豫將逞姦回之志妄談禍福之端屬朕

纘臨覬專威柄僻違之狀滋見於反常毀讟之言更

彰於無上比從罷免猶示矜寬旣蒐蒐惡之旋聞且閱

實而具在背恩棄德一至于斯竄逐遐方實乃自取

可貶授將仕郎守崖州司戶叅軍員外置同正員乾興元年七月辛卯

謂因教女道士劉德妙語涉妖誕事再貶謂崖州司戶諸子並勒停籍其家得四方賂遺不可勝紀仍以謂罪狀播告中外始謂命宋綬草寇準責詞綬請其故謂曰春秋無將漢法不道皆證事也綬雖從謂指然卒改易謂本語不純用及謂貶綬猶當制卽草詞曰無將之戒舊典甚明不道之辜常刑罔赦朝論快焉○謂初逐準京師爲之語曰欲得天下寧當拔眼中丁欲得

天下好莫如召寇老不半歲謂亦貶人皆爲報復之速天道安可誣謂竄崖州道出雷州準遣人以一蒸羊逆之境上謂欲見準準拒絕之準聞家僮欲報讐亟杜門使縱博毋得出伺謂行遠乃罷○詔臣僚有曾與丁謂往來者一切不問時遣御史方謹言籍謂家得士大夫書多干請關通者悉焚之不以聞世稱其長者○謂家寓洛陽在朱崖凡五年嘗爲書自克責叙國厚恩戒家人毋輒怨望且述其受遺冊立之功有云臣有彌天之罪亦有彌天之功遣人致于西京

留守劉燁祈付其家戒使者伺燁會衆僚時遠
之燁得書不敢私卽以聞上見之感惻遂自崖
州司戶徙雷州司戶謂雅多智是猶出於揣摩
也宰相言謂天下不容其罪而竄之今不緣赦
宥未可內徙上曰謂斥海上已數年欲令生還
嶺表爾天聖八年以雷州司戶丁謂爲道州司
戶始南郊肆大赦中外疑謂必將內徙刑部員
外郎兼侍御史知雜事劉隨言彼擅移於陵域
將不利於君親只合取彼頭顱置諸郊廟殿中
侍御史張錫言謂姦邪弄國罪當死無可憐且

大臣竄逐本與天下棄之今復還是違天下意
由是止徙道州明道二年皇太后不豫大赦謫
者皆內徙丁謂特許致仕並長編景祐四年光州
言祕書監致仕丁謂卒王曾聞之語人曰斯人
智數不可測在海南猶用詐得還若不死數年
未必不復用斯人復用則天下之不幸可勝道
哉吾非幸其死也

同日任中正罷叅知政事

自兵部尚書罷爲太子賓客知鄆州

中正自大中祥符九年九月除樞密副使天禧
元年九月除同知樞密院事三年十二月除樞

密副使四年八月除叅知政事是年六月罷爲
執政凡六年事仁宗纔數月中正之貶坐營救
丁謂故也後復禮部尚書卒贈左僕射謚康懿
弟中師仁宗時爲樞密副使

七月辛未王曾拜相

自行禮部尚書叅知政事除中書侍郎同平章事集賢殿大學

士充會靈觀使

制曰舜績方茂選衆而舉臯陶周邦旣隆降神而得
山甫良弼之任群黎式瞻必惟其人同底于道今朕
博采輿議用符揀求擢茲調護之勲列于衡宰之重
載洎今日誕舉徽章具官王曾簡亮忠純直清粹厚學窮

師法文擅國華登俊選於昌辰冠時名於多士荐當
大任遂翊洪鈞達胡廣之朝章究房喬之吏事出臨
都會克樹於風穀來復近司愈隆於望實間緣冲眇
始蒞政經寔賴師賓以資訪問方紹隆平之業豈忘
輔翼之勞是用旌一德之贊商舉三篇而命說九功
將叙資乃緝熙衆志未融賴于訓道契風雲之交感
叶憂卜之不違乃眷直庭夙隆使任俾其摠領庶極
寅恭於戲上法乾台方崇於體貌下和民則益峻於
表儀懋宣令猷往踐于位

天聖三年十二月癸丑授行門下侍郎兼戶部

尚書同中書門下平章事充王清昭應宮使昭
文館大學士監脩國史

制曰朕紹休三聖躬覽萬機眷乃股肱之臣方居鼎

軸之重進圖賢業擢冠宰廷適涓剛辰誕告明命具

王曾同寅一德入贊兩朝懿學洪文通天人之極摯沉

識厚望竦中外之具瞻綱紀群倫緝熙百度是用總

祠真館正位黃扉加命地卿兼榮史觀秉我魁柄穆

于政途於獻天之三台以上幹於元緯國有四輔以

下經於大謨其懋乃功徃弼予治

五年二月除提舉脩真宗皇帝國史故事宰臣

自領監脩國史至是以曾提舉猶別降下勅以

命之曾嘗請用孫奭馮元勸講殿中又薦叅知

政事呂夷簡才望可當政柄夷簡遂拜相

同日呂夷簡管宗道並叅知政事夷簡自龍圖閣直

權知開封府遷給事中除宗道自龍圖閣直

學士兼侍講判滌內銓遷右諫議大夫除

夷簡字坦夫河南人大理寺丞蒙亨之子宰相

蒙正之猶子也宗道字貫之亳州人○夷簡擢

進士又舉制科嘗通判通濠二州徃河北按行

水災于時田器有美還奏請除之真宗納其言

自是天下農器皆免美時王曾為知制誥一日

至中書見王旦曰君識呂夷簡乎曾曰不識也
旦曰夷簡器識遠大君其善交之當與君對秉
鈞軸曾曰公何以知之旦曰吾亦不識夷簡但
以其奏請得之如不稅農器是也後以刑部郎
中權知開封府嚴辦有轍上識其姓名于屏風
意將大用之也會雷允恭擅移山陵詔夷簡與
魯宗道按視還拜給事中叅知政事仁宗嘗問
輔臣曰四方奏獄來上不知所以裁之夷簡曰
允奏獄或出於疑則從輕可也仁宗深以為然
終仁宗之世疑獄一從於輕

事

天聖元年詔曰

三路軍儲出於山澤之利比聞移用不足二府
大臣其經度之乃命三司使李諮等及三司副
使較茶鹽礬稅歲入登耗更定其法遂置計置
司以樞密副使張士遜叅政呂夷簡魯宗道總
之

長編○叅樞
總計置司

二年合祭天地于園丘王欽若

封冀國公曹利用改封魯國公文武百官並加

恩故事輔臣例遷官夷簡與同列豫辭之遂著

為式

南郊輔臣豫辭遷
官自呂夷簡始

○宗道為人剛正嫉惡

少容遇事敢言不為小謹為諭德時居近酒肆

嘗徵行就飲肆中偶真宗亟召使者及門久之

宗道果自酒肆來使者先約曰卽上惟公來遲何以爲對宗道曰第以實對使者曰然則公當得罪曰飲者人之常情欺君臣子之大罪也真宗果問使者具以宗道所言對帝詰之宗道謝曰有故人自鄉里來臣家貧無杯酌故就酒家飲帝以爲忠實可大用嘗以語太后太后識之於是旣夷簡皆首蒙擢任 長編

丙子錢惟演樞密使

自樞密副使除依前兵部尚書充樞密使祥源觀使

制曰樞密之任軍國是經獻納詢謀用弼臣而更踐等威廉級與宰司而比崇其於簡求必及才望今朕

舉朝曄之英彥得儲闈之舊勳陟以使名允孚公議褒賢詔德其在于茲 具官錢惟演 生王侯之慶門稟星象

之嘉瑞忠爲代法行本天資以山濤之清淳傅丙吉之寬裕學總經邦之奧辭探復雅之微佐佑先朝徊翔近列沃心造膝居多蹇正之言守位直躬靜有端莊之操暨予眇質始預政經爰以嘉謨入叅賓席日講溫文之範彌彰護翼之勤迄今纂承豈忘甄擢用是載消良吉胥協群倫疇其贊務之勞峻此卽真之拜雷風之令允賴於翊宣飪餼之和良增於倚屬於戲后非賢而罔乂民率德而具瞻方資棟幹之隆以

承詒燕之業往服休命毗于大邦

國朝樞密使帶檢校官今惟演止以

尚書充使非例也

十一月丁卯錢惟演罷樞密使

爲保大軍節度使如河陽

制曰任以中權總兵符之雄重倡于九牧寄民政之惠和適均佐佑之勤固無出處之異爰稽穀旦誕告

群倫

具官錢惟演

敏學本於宗師懿文恢乎事典挺生勳

闕之後允作柄臣之良乃登樞庭實掌邦要處崇高而是畏務冲挹以載懷頃露由衷懇祈遜職宅予憂之尚默從乃欲之未遑雖帷幄本兵方資於策慮而葭莖聯戚緣避於嫌疑是用解機務之繁陟齊壇之

貴殿彼鄜時以控西隲守茲盟津以壯右輔褒功賦邑併示寵徽於戲持盈守成朕方欽於治本敦詩說禮汝無墜於家聲惟明哲可以保厥身惟靖共可以綏厥位嘉乃達識豈煩訓辭

惟演自天禧四年八月除樞密副使乾興元年

七月除樞密使是年十一月罷在樞府凡三年

○初惟演見丁謂權盛附之與爲婚姻謂逐寇

準惟演與有力焉及序樞密院直學士題名石

獨刊去準名曰逆準削而不書謂禍萌惟演慮

併得罪遂擠謂以自解馮拯惡其爲人因言惟

演以妹妻劉美實皇太后姻家不可預政請出
之乃出惟演爲鎮國留後卽日改今命編長惟演
自河陽赴亳州因朝京師圖入相監察御史鞠
詠奏惟演儉人嘗與丁謂爲婚姻緣此大用後
揣知謂姦邪禍萌懼牽連得禍因出力攻謂今
若遂以爲相必大失天下望太后遣內侍持奏
示之惟演猶顧望不行詠語左正言劉隨曰若
相惟演當取白麻廷毀之惟演聞乃亟去天聖
九年改判陳州判河南府始惟演託疾久留京
師旣除陳州遷延不赴且圖相位天章閣待制

范諷奏曰惟演嘗爲樞密使以皇太后姻屬罷
之示天下以不私今固不可復用殿中侍御史
郭勸亦請督惟演上道惟演自言先隴在洛陽
願司宮鑰遂命惟演守河南促其行景祐元年
惟演卒特贈侍中惟演始以父歸國故亟顯然
自以才能進文辭清麗名與楊億劉筠相上下
家聚書多於秘府在館閣與楊億同脩策府元
龜凡千篇喜獎勵後進歐陽脩尹洙皆出幕下
雖官兼將相階勲品皆第一而終不歷中書故
嘗謂人曰吾平生所不足者惟不得於黃紙尾

押字耳

長編

同日張知白樞密副使

自翰林侍講學士尚書右丞知南京召除兼祥源觀使

知白前爲叅知政事是時王欽若爲相與知白

議論多不合知白以疾辭位罷爲翰林侍讀學

士知大名府徙南京至是欽若分司南京衆謂

知白必報之而知白待之加厚論者多之仁宗

卽位召入爲樞密副使知白在樞府三年至天

聖三年十二月拜相

天聖元年

癸亥

九月丙寅馮拯罷相

自司徒兼侍中罷爲檢校太尉兼侍中武勝軍節度使判河南

府兼西京留守

制曰崇德報功本皇王之首務出藩入輔申賢傑之

壯猷乃眷元臣久當天任勉徇懷於素守庸誕告於

群倫馮拯秉節剛方處心忠亮體和能斷好謀而成

往事先朝浸膺重委屬文考之末命奉冲人而繼明

宣力居多積功甚茂比嬰疾疢繼露封章願解事權

備形悃悃雖屢申於敦諭然固執於謙冲是用付南

陽之節麾寄西宅之符鑰衍之多戶益以真封併舉

徽章式尊舊德於戲君臣之分要雋於始終出處之

宜用均於勞逸其祗休命以保令圖

拯以天禧四年十一月拜相是年九月罷入相踰二年○先是二府議以天書葬永定陵尋爲應天禪院奉安真宗御容禮儀使疾作賜白金五千兩以亮陰不克問疾叩頭謝五上表願罷相於是遣使卽卧內以告命旌蠹賜之拯病不能赴河南而卒贈太師中書令謚文懿拯爲相氣貌嚴重宦者傳詔至中書不延坐尚書林特嘗詣第累日不得通白以咨事使詣中書旣至又遣堂吏謂之曰公事何不自達朝廷卒不見特大媿而去長編

同日王欽若拜相

自刑部尚書知江寧府召拜守司空兼門下侍郎同平章事充王清昭應宮使昭文館學士監修國史再入相

制曰朕猥以眇質獲紹丕圖言念爲君之難實惟任

賢之重輔茲不逮眷於老成聿采民瞻用符帝賚具

王欽若逮事先帝嘗升近司彌綸萬幾表險一節向均

勞逸出莅藩垣政胥穆於民風心雅存於王室屬廟

堂虛位龜筮協謀疾置召還嘉猷入告俾復升於台

路仍併躡於徽章於戲三公無官以帥百僚之治一

人有慶以遺兆民之休坐恢國猷永作賢弼

欽若前以天禧元年八月拜相至三年六月罷

相是年自知江寧召復拜相○先是錢惟演自河陽赴亳州因朝京師圖入相監察御史鞠詠力攻之惟演聞乃亟去馮拯病太后有復相欽若意欽若時以刑部尚書知江寧府上嘗爲飛白書王欽若字適欽若有奏至太后因取字緘置湯藥合遣中人齎以賜且口宣召之輔臣皆不與聞欽若至國門始命中書徙知潤州光祿卿王隨代欽若欽若始入見馮拯罷相判河南府欽若遂有是命欽若再入中書謂平時百官叙進皆有常法爲叙遷圖以獻異便者覽然亦

不復能大用事如真宗朝矣同列往往駁議欽若不堪曰王子明在政府日不爾也魯宗道曰王文正先朝重德固非它人可企公若執政平允宗道安得不伏長○二年合祭天地于圜丘

以宰臣王欽若爲南郊大禮使進司徒封異國公時翰林學士承旨李維爲禮儀使翰林學士晏殊爲儀仗使權御史中丞薛奎爲鹵簿使權知開封府王臻爲橋道頓遞使故事宰相爲大禮使太常卿爲禮儀使御史中丞爲儀仗使兵部尚書爲鹵簿使開封府爲橋道頓遞使國初

循用此制其後太常卿御史中丞兵部尚書或闕乃以學士及他尚書丞郎領之其職掌仍用禮院御史臺兵部吏如故儀衛名物皆鹵簿所頒儀仗使惟督促諸司而已又使領次第則大禮禮儀儀仗鹵簿而橋道頓遞最居其下真宗封禪五使皆以輔臣爲之及上玉皇尊號宰相向敏中當爲禮儀使以年老不任贊道更命樞密使王欽若而敏中乃領儀仗使蓋失之矣今有中丞而換使名非故也長編○南郊宰○三年以宰臣王欽若爲譯經使唐譯經史以宰相

明佛學者兼領之國朝翻譯經論初令朝官潤文及丁謂相始置使欽若乃因譯經僧法護等請爲使議者非之同上

天聖三年乙丑

十月辛酉晏殊樞密副使

自翰林學士兼侍讀學士禮部侍郎知制誥除時年

七十

殊字同叔撫州臨川人七歲能屬文號神童仁宗封昇王以殊爲記室及爲皇太子爲左庶子是歲遂有是命

十一月戊申司徒兼門下侍郎平章事冀國公王欽

若卒欽若以天聖元年九月拜相是年十一月薨于位再入相二年○欽若感疾車駕幸其第臨問賜白金五千兩後三日卒皇太后臨奠出涕贈太師中書令謚文穆錄親屬及所親信二十餘人女婿大理評事張瓌除秘閣校理國朝以來宰相恤恩未有欽若比者欽若狀貌短小頰有附疣時人呼爲癭相智數過人每朝廷有所興造委曲遷就以中上意又性傾巧敢爲矯誕○太后以先朝所寵異故復用之及知郿武軍職方員外郎吳植事敗乃王欽若所薦舉

太后頗解體同列稍侵之欽若愷愷以沒後有詔塑其像茅山列于僊官左正言劉隨言欽若賦污無忌憚考其行豈神僊耶宜察其妄不報長編欽若與楊億等同撰策府元龜有褒詔則自爲表謝譴問則戒吏云第言億等故馬知節面斥其姦罔仁宗亦嘗謂輔臣曰王欽若久在政府察其所爲真姦邪也王曾曰欽若與丁謂林特陳彭年劉承珪時號爲五鬼其姦邪險詖之迹誠如聖諭

十二月癸丑張知白拜相

自樞密副使行尚書右丞充祥源觀使授工部尚書

同平章事充會靈使集賢殿學士同日王曾進昭文相

制曰朕以四海至廣萬機至繁惟時惟幾寔賴良輔

具官張

恭允薦實清直惠和頃從禁塗入贊樞極忠

嘉有守方毅不回是用擢進宰司升華省座進兼書殿之職仍總靈宮之祠於戲代天之工上列三階之象秉國之務下遂萬物之宜益宣令猷式副予倚

是日宰相王曾加門下侍郎兼戶部尚書昭文館大學士樞密副使尚書右丞張知白加工部尚書同中書門下平章事集賢殿大學士樞密使曹利用加司空○國朝故事以宰相爲首親

王次之使相又次之樞密使雖檢校三師兼侍中尚書中書令猶班宰相下咸平初曹彬以樞密副使兼侍中位戶部侍郎平章事李沆下循故事也乾興初王曾由次相爲會靈觀使曹利用由樞密使領景靈宮使時以宮觀使爲重詔利用班曾之上然議者深以爲非至是曾進昭文館大學士王清昭應宮使同集殿廬將告謝而利用猶欲班曾上閣門不敢裁帝與太后坐承明殿久之遺押班江德明趣閣門閣門惶惑不知所出曾抗轂目吏曰但奏宰相王曾等告

謝班既定利用鬱鬱不平時樞密副使張士遜亦加左丞帝使士遜慰曉之詔宰相張知白上及班如故事而利用志驕尚居次相張知白上及聞召張旻于河陽爲樞密使疑代已始悔懼焉

編長

乙丑張旻樞密使

自淮南節度使檢校太師同平章事旻旻尋改名耆

張耆鎮河陽太后召耆爲樞密使旻殊言樞密與中書兩府同任天下大事就令乏賢亦不宜使中才處之耆無他勲勞徒以恩倖遂極寵榮天下已有私徇非才之議奈何復用爲樞密使

也太后不悅

編長

耆旻既拜樞密使封岐國公耆初

名旻至是改焉七年二月除會靈觀使兼群牧

制置使十年八月除尚書右僕射明道元年十

一月除昭德軍節度使兼侍中

天聖五年

丁卯

正月己未旻殊罷樞密副使

自刑部侍郎罷知宣州

殊自天聖三年十月除樞密副使是年正月罷

在樞府踰年○先是殊言張耆不可爲樞密使

太后不悅至是從幸王清昭應宮從者持笏後

至殊怒撞以笏折其齒監察御史曹修古等劾

奏殊身任輔弼百僚所法而忿躁無大臣體古者三公不按吏先朝陳恕於中書榜入卽時罷黜請正典刑以允公議殊坐是免出知宣州尋改知應天府殊至應天乃大興學范仲淹方居母喪殊延以教諸生自五代以來天下學廢興自殊始

長編

戊辰夏竦樞密副使

自翰林學士兼侍讀學士龍圖閣學士起復尚書左司郎中知

制誥遷右諫議大夫除

竦字子喬江州德安人中制舉爲直集賢院仁宗封慶國公宰相王旦薦竦才遂命教慶國公

書是時君臣爭言符端竦獨抗疏以爲不可及大臣領王清昭應宮使以竦爲判官由是附會神恠僥倖進取以至累遷是年遂有此除二月兼脩國史六年三月兼權發遣宣徽院公事

天聖六年

戊辰

二月壬午工部尚書平章事張知白卒

知白以天聖三年十二月拜相是年二月薨于位入相踰二年○知白在相位惜名器無毫髮私常以盛滿爲戒憂畏日侵雖顯貴其清約如寒士至是在中書忽感風眩輿歸第而卒贈太

傳中書令家貧太后諭王曾等令共恤其家禮
官謝絳謚議文節御史王嘉言以謂絳止述車
駕臨問視其寢處儉素爲之動容乃引好謙自
克爲謚似畧其大而錄其小以知白守道徇公
當官不撓可謂正矣請謚文正王曾曰文節美
謚矣遂不改知白不喜曾宗道嘗語人曰銓曹
中取一最不材選人軍巡獄中求一最無行者
亦當優於此人矣

長編

三月壬子張士遜拜相

自樞密副使行尚書左丞充
祥源觀使授禮部尚書同平章

事充集賢
殿大學士

制曰鈞宰之司總裁萬化故道存兼濟若舟楫之乘

巨川義在相須若股肱之衛元首自非邦雋曷慰民

瞻爰擇剛辰式頒顯冊

具官張
士遜

材膺敏達德蹈中和

先皇帝簡自聖心寘之清貫蚤輔學於儲禁遂密謀
於宥廷而能謹密自持將明有裕屬予纂序彌所仰
成適從選衆之求粵有登庸之拜既兼榮於書殿仍
加秩於禮卿益以邑封副之真食斯爲異渥以寵舊
勞於戲開德宣符其本泰階之象參坐議政莫如公
袞之尊惟正色可以弼違惟純誠可以亮采無使房
魏姚宋專美於有唐也

張知白既卒上謀所以代之者宰臣王曾薦呂夷簡樞密使曹利用薦張士遜太后以士遜位居夷簡上欲用之曾言輔相當擇才不當問位太后許用夷簡夷簡因奏事言士遜事上於壽春府最舊且有純懿之德請先用之太后嘉其有讓遂相士遜從利用之言也長編

同日范雍姜遵並樞密副使

雍自龍圖閣學士右諫議大夫權三司使除仍

詔班姜遵之上 遵自右諫議大夫知永興軍除

雍字伯純河南人遵字從式淄州人○七年二月范雍權祭遣宣徽院事累遷禮部侍郎○遵

在永興章獻太后遣內侍魯繼莘於永興營浮圖遵希太后旨躬自督治既成乃得召用遵長於吏事其治尚嚴猛所誅殘者甚衆時人號為姜擦子天聖八年九月卒贈吏部侍郎遵在樞府踰二年疾且革車駕臨視賜白金三千兩卒又臨奠輟朝

天聖七年已巳

正月癸卯曹利用罷樞密使

依前保平軍節度使守司空檢校太師兼侍中

判鄆州

制曰朕謹經國之方厚御史之禮顧倚謀於舊德久

具官曹

才推應物
嬰務於繁機式均爾勞庸告在位利用才推應物
資適逢時往使交兵之間遂成繼好之利逮受遺於
先帝委輔政於冲人時無金革之虞自决廟堂之勝
間露言於累牘祈出守於近符特徇由秉以聰避寵
於戲識進退之分則臣節達全始終之恩則君義明
宜體眷懷勿忘欽率

初太后臨朝威震天下中人貴戚稍能軒輊為
禍福而利用以勲舊自居不卹也凡內降恩力
持不與左右多怨太后亦嚴憚利用稱待中而
不名利用奏事簾前或以指爪擊帶鞞左右指

以示太后曰利用在先帝時何敢爾耶太后領
之利用奏抑內降恩或屢卻而復下則有黜勉
從之者久之人頗知其然或給太后曰蒙恩得
內降雖屢卻於樞密院今利用之家媪陰誥諸臣
請其必可得矣下之而驗太后始疑其私頗銜
怒內侍羅崇勳得罪太后使利用召崇勳戒勅
之利用去崇勳冠幘詬斥良久崇勳耻恨會從
子泐為趙州兵馬監押而州民有請闕告泐不
法事奏上崇勳方待 自請往按治鞫泐于真
定府卽罷利用樞密使長編崇勳等窮按曹泐獄

獄具汭坐被酒衣黃衣令軍民呼萬歲且傳致
汭辭云利用實教之上以問執政皆顧望未有
對者張士遜進曰此獨不肯子爲之利用大臣
宜不知狀太后大怒將併逐士遜而王曾徐亦
爲利用解太后曰卿嘗言利用橫肆今何解也
曾曰利用恃恩素驕臣每以理折之今加以大
惡則非臣所知也太后意少解貶利用爲左千
牛衛上將軍知隨州詔杖殺汭上同曹利用嘗私
貸官錢再貶爲崇信節度副使房州安置仍命
內侍楊懷敏護送之時朝廷以利用嘗所荐擢

者多領兵守邊欲悉罷去之殿中侍御史鞠詠
請一切毋治以安反側詔從詠言宦者多惡曹
利用必欲致之死地楊懷敏逼之利用素剛遂
自經于襄陽驛上同○始契丹深入寇朝廷方歎

兵第憂和不就故於聘賂無所愛而利用以小
官奉使敢任大事力斬其數於國有勞旣富貴
負恃以爲已功性又悍鯁少通力裁僥倖而其
親舊亦有因緣而進者故及於禍然其在朝廷
忠蓋有守始終不爲柔屈死非其罪天下寃之
後其家請居鄧州上惻然從之上同利用後追復

開府儀同三司守司空檢校太師兼侍中保平
軍節度使上柱國鄆國公贈太師康定元年九
月謚襄悼皇祐二年立碑以旌功爲額

利用追復制曰夫記人之功忘人之過哲王令典朕

每慕之追惟輔臣且罹深憲肆頒禮命用音營魂

信軍節度副使房州安置曹利用早蓄壯圖遂階膺仕使殊鄰而交

聘克著勤庸侍近幄以矢謨歷居顯位爰從吏議再
削官封言念謫居久淪幽壤屢申恩而賜宥宜追遠
以軫懷旌靈貂蟬公槐峻秩密章告第式示寵榮

謚襄悼詔曰居寵保終爲臣或闕其全社念勞恤徃

有國所務於至恩

贈太師曹利用

頃事先朝密宣忠力嘗講

和戎之利寢階秉軸之榮位不期驕禍生所忽終緣

族子之累遂謫房陵之行齋恨奄殂撫情加悼嚮從

昭洗並復寵名而於節惠之文不及有司之議宜推

褒典用飾前庸謚法有因事有功曰襄恐懼徒處曰

悼宜賜謚襄悼仍詔立碑以旌功爲額

並大詔令

二月庚申朔禮部侍郎叅知政事曾宗道卒

宗道自乾興元年七月除叅知政事天聖六年

三月除禮部侍郎祥源觀使是年二月卒執政

凡七年○太后臨朝宗道屢有獻替太后問唐

武后何如主對曰唐之罪人也幾危社稷太后
默然時有上言請立劉氏七廟者太后以問輔
臣衆不敢對宗道獨曰不可退謂同列曰若立
劉氏七廟如嗣君何帝太后將同幸慈孝寺欲
以太后輦前帝行宗道曰婦人有三從太后命
輦後乘輿行執政多任子於館閣讀書宗道曰
館閣育天下英才豈統禔子弟得以恩澤處耶
吾子誠幼已任京官然終不使恩國恩曹利用
特權驕橫宗道屢折之帝前貴戚用事者莫不
憚之時目爲魚頭叅政因其姓且言骨鯁也在

政府七年務裁抑僥倖不以名器私人及被疾
浸劇仁宗幸其第臨問賜白金三千兩旣卒皇
太后又臨奠輟朝贈禮部尚書初太常議謚曰
剛簡後改爲簡肅議者以爲肅不若剛爲得其
實也

長編

丙寅張士遜罷相

授刑部尚書知江寧府

制曰入幹萬幾以總代天之職出倡九牧以宣美俗
之風維時輔弼之賢迭爲朝廷之重其頒明制以告
治廷具官張識用冲深器懷沉遠早從朝路旣陪東

學之游肆翼天飛遂正中階之列兼節在位宣勞有

年念經邦務之煩庸寄藩符之佚天臺之峻司寇帥
於五刑澤國之饒秣陵都于一會載更顯序往布寬
條於戲君之遇臣要始終而盡禮下之報上無出處
而或渝允迪乃休以服朕命

士遜自天聖六年三月拜相至是年二月罷爲
相僅一年○士遜得相曹利用之薦也利用長
樞密覘寵自恣士遜居其間未嘗有是非之言
時人目之爲和鼓利用得罪士遜又營救之利
用旣斥士遜隨亦罷上以士遜東宮舊臣故加
秩而遣之辭日又解通犀帶賜馬長編九年以刑

部尚書知許州張士遜爲定國節度使檢校太
傅時士遜朝京師異復入相天章閣待制鞠詠
奏曰曹利用擅威福士遜與之共事相親厚援
薦以至相位陛下特以東宮僚屬用之臣願割
舊恩伸公議趣使之藩士遜乃赴許州同上

同日呂夷簡拜相

自參知政事依前戶部侍郎同平章事充景靈宮使集賢殿大學士

制曰王者之建宰職也上法台象以代天工下裁物
宜以統萬類庶衆志而叙彛倫調四時而翊元化允
資名器必契僉同疇其貳政之能寵以登庸之拜具

呂夷簡學探奧蹟器蘊宏深夙推經世之才動著首公

之節以懿文而潤謨訓以精力而剗劇繁譽滿朝端
績成官下朕初臨邦統尤渴時賢權佐鼎司嘉聞國
論勵匪躬之道而無失守節叶成務之宜而弗忘稽
古方今遵祖宗之憲度致中外之治平懷於永圖賢
乃良輔已試之効旣彰於時爰立之恩素定于志俾
對司於衡軸用正位於鈞台總職直官兼榮書殿仍
增命數載峻寵章於戲自昔哲王注懷重任或營求
方獲或枚卜乃從曷若閱于臣隣得此棟幹旣稔彌
綸之業更資異亮之功聳列辟之具瞻繼宗門之茂
躅勤宣休問式荷至榮

始王曾薦夷簡可相久不用士遜將免曾因對
言太后不相夷簡以臣度聖意不欲其班樞密
使張耆上兩耆一赤脚健兒豈容妨賢至此太
后曰吾無此意行用之矣於是卒相夷簡以代
士遜七月罷輔臣所領諸宮觀使各從呂夷簡
張耆夏竦之請也罷輔臣宮觀使名八月己丑除吏部
侍郎同中書門下平章事昭文館大學士監修

國史

制曰統和庶工運理群物惟時元弼之重以承上天
之休容合僉謀誣告列位具官呂夷簡道通元本學富經

綸勤勞兩朝終始一節惟寬厚足以鎮俗惟忠嘉足以熙朝文昌上相之司以進恢於乾緯天官冢卿之貳以均治於邦彞儒館祕局爰田多戶併加異數用示注懷於戲外鎮撫四夷蓋自近始內親附百姓必以身先汝惟欽哉罔假多訓

明道元年二月呂夷簡加中書侍郎初授表簡中書侍郎兼兵部尚書固辭兵部尚書乃令學士院貼麻仍遣內侍都知藍繼宗就閣門賜之八月兼脩葺大內使十一月上以脩內成宰臣呂夷簡加右僕射兼門下侍郎表簡固辭所加

官乃令翰林貼麻改門下侍郎兼吏部尚書

同日夏竦薛奎並叅知政事

竦自樞密副使兼脩葺國史給事中推發遣宣徽院公事除

奎自龍圖閣學士右諫議大夫權

陳堯佐樞密副使

自翰林學士兼龍圖閣直學士右諫議大夫知制誥權知開封府除

奎字宿執絳州正平人堯佐字希元樞密使陳

堯叟之弟○奎拜叅知政事入謝太后曰先帝

嘗以卿爲可任今用卿先帝意也累除禮部侍郎

郎

六月甲寅王曾罷相

依前吏部尚書知袁州

制曰朕紹膺丕緒臨撫群元內各輔弼之良外倚蕃

宣之重君臣之遇出處攸同王曾學洞聖機識窮物
表早冠倫於多士荐宣力於先朝逮予繼承允所倚
屬爰定謀於枚卜遂擢宣於冢司眷言靈官總在宰
職追惟文考之奉具有列聖之祠妖焰挺災一夕而
既俾紆勞於鼎路且賦政於師垣矧惟累牘之陳時
乃素懷之遂於戲事君盡禮維舊德之靡遠觀過知
仁亦至公之難廢勉膺明命往惟欽哉

曾自直宗乾興元年七月拜相至仁宗天聖七

年六月罷入相凡七年○始章獻太后受尊號

冊將御大安殿曾執不可卽改御文德及長寧

節上壽曾執不可如前皆供張別殿太后左右

姻家稍通請謁曾多裁正太后滋不悅會王清

昭應宮火曾以使領不嚴累表待罪乃罷相出

守尋改青州長編八年以吏部尚書知天雄軍王

曾爲彰德節度使仍知天雄軍契丹使者往還

肅車徒而後過無敢大聲疾呼者人樂其政爲

畫像而生祠之實元元年鄆州言左僕射王曾

卒贈侍中謚文正曾安貧端厚眉目如刻畫盛

服屹然入朝進止有常處平居寡言自奉廉約

人莫敢干以私其名重天下少與楊億同在侍

從億善談諧與曾言則曰余不敢以戲也前後
 輔政十年其所進退士人莫有知者范仲淹嘗
 以問曾曾曰夫執政者恩欲歸己怨使誰當仲
 淹服其言皇祐中上為篆其墓碑曰旌賢之碑
 大臣碑得賜篆自王曾始曾處天下事審而中禮居家人不
 見其喜愠之色在上前開陳許可辨博其餘治
 平中以曾配享仁宗廟庭

八月辛卯夏竦復為樞密副使

自給事中叅知政事
遷刑部侍郎除

陳堯佐改叅知政事

自左諫議大夫樞密副使遷給
事中除

王曙叅知政事

自御史中丞遷工部郎中除

時宰臣呂夷簡加吏部侍郎昭文館大學士叅
 知政事夏竦加刑部侍郎復為樞密副使陳堯
 佐加給事中改叅知政事竦與夷簡不相悅故
 以堯佐易之○竦自天聖五年正月除樞密副
 使七年二月除叅知政事至是復為樞密副使
 累遷尚書左丞○曙字晦叔河南人隋文申子
弟績之後
名同英宗御諱故
以字稱亦名曉曙舉進士及舉賢良方正
 入等後為給事中太子賓客冠準被罪晦叔即
 其婿也落職知汝州責郢州團練副使後入為
 御史中丞是年遂有是除

天聖八年 庚午

九月己巳趙稹樞密副使

自樞密直學士刑部侍郎除

稹字表微宣州宣城人劉美人家婢出入禁中

大招權利稹厚結之擢稹爲樞密副使命未出

人馳告稹稹問東頭西頭蓋意在中書世傳以

爲笑

明道元年 壬申

天聖十年十一月始改元明道

二月庚戌張士遜拜相

自定國軍節度使檢校太傅兼御史大夫知許州召授行

刑部尚書同平章事集賢殿大學士再拜相

制曰國家登用邦傑緝熙政途出則懷息而爲落文

則從容而論道聿圖舊望再陝近司

其官張士遜

直諒兼

容純和秉粹文學資其器用忠厚本於誠明蚤自宰

庭出臨方面尋分將鉞作鎮陪京荐彌歲時亶有勳

績雖均勞逸之任靡忘寤寐之懷是用還秩秋卿參

調鼎鉉特疏多邑之賦仍加真食之封誣舉徽章式

諸僉論於戲奉天惟聖用憲於聰明代工其人允歸

於燮理勉興盛治以昌宏圖

士遜前以天聖六年二月拜相七年二月罷知

江寧府呂夷簡遂代士遜居二年朝京師除定

國軍節度使知許州是年二月復召入相明道

元年十一月上以脩內成加中書侍郎兼兵部

尚書二年四月呂夷簡罷相已未加門下侍郎

昭文館大學士監脩國史

制曰代天工者在乎庶官總邦治者繫乎冢宰苟非
巖廊宿望棟幹竒才何以副區夏之具瞻荷朝廷之
大任我有良弼僉曰其人方隆眷注之懷宜被甄升
之命聿申誕告式協至公具官張士遜明允疑心粹和毓
質懿行循於憲度嘉言本乎典常未邸効官有諒直
之益青宮分職存輔導之規逮進位於樞庭復聯榮
於相府整弼諧之素志存將順之深忠旣而偃息藩

垣撫綏黎庶大布中和之治每懷翼戴之誠因出建
於節旄遂入居於台鉉益顯和羹之譽彌彰補袞之
能協贊萬機見百工之咸秩周旋一德俾庶政之克
諧是用登左省之崇資兼文館之重任旣加采邑仍
錫真封用是褒嘉式符毗倚於戲萬方砥厲允賴於
謨猷四氣均和方資於燮理宜循古訓以佐躬躬俾
協大中無忝休命

七月乙酉王曙罷叅知政事資政殿學士戶部侍郎知陝州

曙自天聖七年八月除叅知政事至是以疾自

請執政凡二年

八月庚子朔晏殊樞密副使

自三司使兵部侍郎除丙午改叅知政事

天聖六年晏殊之出也上意初不謂然後欲用

之會季及卒召殊於南京命為御史中丞仍命

班翰林學士上是年遂有此除未幾改叅知政

事十一月除尚書左丞

甲辰楊崇勳樞密副使

自殿前都指揮使鎮南軍節度使遷定武軍節度使宣徽

南院使除十二月壬寅拜樞密使

崇勳其先蘄州人父全美仕太宗為指揮使真

宗即位崇勳累遷至四方館使冠準罷相入內

都知周懷政謀奉真宗為太上皇傳位于仁宗

而復相準崇勳告其事遂誅懷政仁宗立遂有

是除十二月除山南東道節度使樞密使

明道二年

癸酉

是年三月皇太后崩仁宗始親政

四月己未呂夷簡罷相

授檢校太傅同平章事充武勝軍節度使判澶州

制曰我國家欽崇實命撫育縣區必求絕俗之才以

副經邦之寄其有久居政府夙冠台司著績用以滋

多執謙冲而愈甚俾遂蕃宣之志用均勞逸之宜

簡道本中和行存端厚早負經綸之業每彰優裕

之教尹正邦畿繼聞善治叅禪宰府屢進忠言逮膺

命相之求彌顯致君之畧動遵舊典靜守常規山甫

保躬不遺明哲弱翁行事罔失便宜歲月逾深謀猷益著以至刊修詔令裁成國書營繕宸居弼諧綉禮事光簡策名播華戎何寵利之不居惟恬和之是務斯用升節旄於近鎮視帝傳之崇賚併增采邑之封仍改褒功之號俾臨巨屏用示優恩於戲入輔出藩盡賢人之美事進禮退義協聖典之格言服我徽章無忘勵翼

夷簡自天聖七年二月拜相至是年四月罷入相凡四年○三月甲午皇太后崩帝始親攬庶政裁抑僥倖中外大悅時夷簡手疏陳八事曰

正朝綱塞邪徑禁賄賂辨姦壬絕女謁踈近習罷力役節冗費其勸帝語甚切帝與夷簡謀以張耆夏竦等皆太后所任用悉罷之退告郭后后曰夷簡獨不附太后邪但多機巧善應變耳由是併罷夷簡及宣制夷簡方押班聞唱其名大駭不知其故而夷簡素厚內侍都知閻文應因使爲中調久之乃知事由皇后云長編○初王曾爲知制誥一日至中書見宰相王且旦謂曾曰呂夷簡器識遠大君其善交之異日當與君對秉鈞軸及夷簡拜集賢相時王曾爲首相與

夷簡同列果如王旦之言曾嘗從容與夷簡具道且語皆嗟嘆以為不可及夷簡當章獻臨御

輯睦二宮卒無聞言

同日張耆罷樞密使

自昭德軍節度使右僕射罷為左僕射檢校太師兼侍中護國

軍節度使判許州尋改陳州

夏竦范雍趙鼎罷樞密副使

竦自尚書左丞罷為禮部尚書知襄州尋改穎

州判雍罷為戶部侍郎知荆南府尋知揚州又改陝州 鑣自吏部侍郎罷為尚書左丞知河

府中

陳堯佐晏殊罷叅知政事

堯佐自禮部侍郎罷為戶部侍郎知永興軍 殊自尚

書左丞罷為禮部尚書知江陵府尋改亳州

者自天聖三年十二月除樞密使至是年四月

罷在樞府凡七年竦自天聖五年正月除樞密

副使七年二月除叅知政事八月復為樞密副

使至是年四月罷在政府凡六年雍自天聖六

年三月除樞密副使至是年四月罷在樞府凡

五年積自天聖八年九月除樞密副使至是年

四月罷在樞府踰二年堯佐自天聖七年二月

除樞密副使七年八月除叅知政事至是年四

月罷執政凡四年殊自天聖十年八月除樞密

副使尋政叅知政事再執政纔數月時章獻太

石上僊仁宗始親萬機一時輔臣皆以優罷云

同日李迪再入相

自資政殿大學士判尚書都省依前行工部尚書同平章事集賢殿

大學士

制曰舜命夔龍用熙於庶績周褒申甫以揉於萬邦

惟公論之攸歸在良臣之是任分持政柄共代天工

苟非出類之英曷稱登庸之選

具官李迪

襟懷平粹字量

闕深榮名夙冠於俊賢蒞事素聞於敏幹典機衡於

相府頗見深忠備輔翼於儲宮允為舊德俄出臨於

外郡繼改鎮於雄藩星瑄屢遷轂馱益著德諧民庶

式昭撫育之功道濟邦家宜荷彌綸之寄是用斷自

朕志擢於書林爰資廡載之能復正調元之任不離

起部遂陟台階加馭貴之榮資改僊殿之重秩爰申

美號併示恩章於戲宰弼之司治亂是繫內則變和

庶事俾協大中外則鎮撫四方用禪至化豈非任重

允謂才難副我倚毗勉爾寅亮

同日張士遜進

昭文館

迪初以天禧四年七月拜相至十一月罷入相

纔四月章獻崩自工部尚書知河陽召為資政

殿大學士判尚書都省是年四月遂拜集賢相

同日王隨叅知政事

自翰林侍讀學士戶部侍郎除

李諮樞密副使

自樞密直學士禮部侍郎權三司使

隨字子正河陽人諡字仲詢臨江軍新喻人

同日王德用簽書樞密院事自步軍副都指揮使福州觀察使遷檢校太保除

德用字元輔父超為懷州防禦使補德用官仁

宗卽位積官至步軍副都指揮使桂福二州觀

察使始太后臨朝有求內降補軍吏者德用曰

補吏軍政也敢挾此以干軍政不可與太后固

欲與之卒不奉詔乃止太后崩有司請衛士坐

甲德用曰故事無為太后喪坐甲者又不奉詔

上閱太后閣中得德用前奏軍吏事竒之以為

可大用故擢任樞密德用謝曰臣武人幸得以

驅馳自効賴陛下威靈待罪行間足矣且臣不

學不足以當大任長編

十月戊午張士遜罷相尚書左僕射判河南府兼西京留守

楊崇勳罷樞密使依前後校太尉同平章事充河陽三城節度使判許州

士遜罷相判河南府制曰輔相之官蓋專國柄審宣

之寄以穆民彞惟逸勞之是均豈出處之為異張士

遜學貫通變行篤忠忱傳羽翼於初潛契股肱之一

德秉節據正允蹈忠臣之風經事造微能成天下之

務寵至而心益戒望高而氣愈冲宜升揆路之華聽

守留都之重於戲文昌百僚之長既屬於老成浴邑

四方之中寔資於保治往綏厥位以服予恩

崇勳罷樞密授使相判許州制曰內樞之職基命是

司爲股肱心膂之臣在左右弼諧之地納忠宣力久

竭於誠明作翰均勞式頒於命數具官揚崇勳忠純夙稟

直亮兼資克懷經世之才茂著首公之節加以該通

義府習練戎經早邁會於昌辰亟升榮於顯任出分

邊任入總禁兵洎登將帥之壇愈重爪牙之寄貫霜

雪而挺操秉金石以存心尋居宥密之司益整將明

之効旣增隆於體貌復首總于樞機宜推優逸之恩

用全進退之禮換節旄之重地兼槐鼎之資崇載錫

美名仍加多賦鎮于近輔允謂報功於戲保明哲之躬在始終而無替眷中外之任用倚注以攸同勉服寵章勿忘不訓

士遜自明道元年二月拜相至是年十月罷復

相凡二年○先是天下旱蝗仍見士遜居首相

不能有所發明上頗復思呂夷簡及百官請洪

福院上章獻太后謚冊退而奉慰士遜乃過崇

勳園飲酒日中不至群臣離立以俟御史中丞

范諷劾奏之遂與崇勳俱罷然制詞猶以均勞

逸爲言也編是年士遜罷平章事除左僕射判

河南府楊崇勳罷樞密使爲河陽三城節度使
同平章事判許州時呂夷簡自武勝軍節度使
同平章事判陳州爲門下侍郎兼吏部尚書平
章事遂以士遜爲山南東節度使同平章事判
許州楊崇勳改判陳州初士遜與崇勳俱入造
謝士遜乃位崇勳下上問其故士遜對曰臣官
僕射而崇勳爲使相上因以使相授士遜時士
遜已罷政事翰林學士承旨盛度草制當言新
除左僕射而誤用士遜舊銜有司奉行制書不
復追改論者非之

同上

同日呂夷簡再入相

自武勝軍節度使檢校太傅同
平章事判陳州授門下侍郎兼
吏部尚書同平章事昭
文大學士監修國史

制曰王者澄清化元陶甄庶品必求茂宰以付大鈞
其有碩望鎮時雄才傑世處阿衡之重任久籍告猷
殿陪京之巨邦彌深注意再陞三階之上庶符四海
之瞻允叶至公爰伸誣告具官呂夷簡道包經濟學富典
彙秉惠和肅哲之資蘊輔相彌綸之業被遇先聖亟
歷榮途弼贊冲人早登柄用自預聞於機政泊首冠
於槐庭叙臯陶之九功總魏相之衆職宣明國體茂
遂物宜荷寵祿而屢辭蹈謙光而不伐萬事皆理實

賴胡公之賢四國于蕃誓勞申伯之政思儀刑而是
 湯在寤寐以寧忘是用特舉徽章入司魁軸天官正
 秩文館崇資史職勲名並還舊貫仍益爰田之賦載
 加直食之封蓋示優褒式彰異數於戲任能圖舊既
 獲於正人垂衣仰成行臻於大治繫乃耆德豈煩訓
 辭

夷簡自天聖七年二月拜相至明道二年四月
 罷為相凡四年出為武勝軍節度使同平章事
 判陳州期以半歲召還是歲上復思呂夷簡遂
 復入相景祐二年二月除右僕射十一月進封

申國公

同日王曙樞密使自資政殿學士行吏部侍郎知河
 南府加檢校太傅充

王德用蔡齊並樞密副使德用自檢校太保簽樞密
 院書事除齊自龍圖閣

學士給事中
 權三司使除

宋綬叅知政事自端明殿學士兼翰林侍讀學士刑
 部侍郎除

曙樞密使制曰王者御世執契所以為域中之尊圖
 舊任能所以成天下之務其有英才傑眾清德服人
 早叅論道之司方重居留之寄宜申渥典入總內樞
 誕告治廷式頒明命具官王曙慮研物表識造幾先秉金
 石以存誠際天人而為學先朝之獎遇斯厚冲人之

卷之四
春倚特隆貳政黃扉夙彰忠節作藩外屏益振風猷
既荐易於星霜固不忘於體貌是用特推寵數擢冠
樞庭庶資帷幄之籌以副股肱之任錫功臣之美號
視師傅之崇資仍益戶封併彰優異於戲總萬機之
密勿實賴謨明整一德以贊襄勉思報效祇佩丕訓
允升大猷

曙以景祐元年七月除依前吏部侍郎檢校太
傅同中書門下平章事充樞密使八月薨于位
在樞密踰年車駕臨奠輟朝贈太保中書令謚
文康曙方嚴簡重有大臣體雖貴顯常深自抑

慎云○齊字子思萊州膠水人舉進士冠甲科
真宗觀齊舉止端雅顧輔臣寇準曰得人矣仁
宗卽位累遷翰林學士章獻后出金帛修景德
寺命齊爲記內侍羅崇勳主營寺事使人陰謂
齊曰趣爲記當叅知政事矣齊曰此言何爲至
於我哉故遲之崇勳怒讒於章獻遂以龍圖閣
直學士知河南府後除御史中丞章獻遺詔以
楊太妃爲太后同議軍國事閣門趣班賀齊毅
然曰天子明聖奉太后十餘年今始躬親萬事
以慰天下之心豈宜女后相繼稱制且自古無

有固止不可太后卒不與政止稱太后于宮中
 是年遂拜樞密副使時魯宗道沮立廟之謀薛
 奎爭服冕之議王晦叔寢脩宮之役蔡齊却臨
 朝之謀真可謂剛毅不回之士也事○綬字公
 垂隨州平棘人仁宗時入翰林爲學士兼侍讀
 加端明殿學士初章獻稱制既久仁宗未嘗獨
 對群臣綬請令中書樞密院非軍國大事及大
 除拜皆前殿取旨臣僚亦只前殿對由是忤章
 獻意出知應天府章獻崩仁宗記其忠且欲大
 用之爲宰相張士遜所抑至是士遜罷遂爲參

知政事景祐二年參知政事宋綬上所編脩中

書總例四百二十九冊降詔褒諭先是呂夷簡

奏令綬爲此旣而謂人曰自吾有此例使一庸

夫執之皆可爲宰相矣長編

端明殿後唐初置學士太平興國中爲文明殿
 學士宋幾殿後重建改曰文德遂不復直學士
 至是又
 置事畧

十一月癸亥朔薛奎罷參知政事自禮部侍郎罷爲
 資政殿學士判尚書

都省仍詔班翰林
 學士承旨之上

奎自天聖七年二月除參知政事是年十一月

罷執政二年○始章獻崩二府大臣皆罷去奎

獨留帝且倚以爲相而奎得喘疾數辭位有詔
免朝謁視事如故又數賜告還第久之乃罷長編
初明道二年章獻謁太廟欲被天子黻冕臣下
依違不決奎不可且曰太后必被黻冕見祖宗
不知作男子拜邪女子拜邪乃止及章獻崩仁
宗見群臣泣曰太后疾不能言而猶數引其衣
若有所屬何也奎遽曰其在黻冕也然服之何
以見先帝乎仁宗大悟卒以后服欵事景祐元
年資政殿學士戶部侍郎薛奎奉贈兵部尚書
謚簡肅奎在政府謀議無所迎避或時不得如

志歸輒歎咤不食家人笑曰何必如是奎曰吾
仰慙古人俯媿後世爾尤善知人范仲淹龐籍
明鎬自爲吏部選人皆以公輔許之後卒如其
言歐陽脩王拱辰皆其女婿也長編

景祐元年

甲戌

八月庚午王曾樞相自天平軍節度使判河南府授
行部尚書依前檢校太師同平

章事

曾拜樞相制曰王者臨御萬邦統寧庶政必資筮艾
之德同底承平之休仍消剛辰誕告有位具官稟粹
厚之氣挺方巖之資叅護儲宮蚤繫道德之助延登

宰路尤寄賞刑之中。豈有休庸載于群論。自均逸於藩輔。寔留想於刑儀。益進天官之聯。總謀樞機之務。民瞻攸屬。邦倚是崇。於戲君之股肱。寔重柄臣之寄。天之喉舌。莫如省坐之榮。繫乃同寅。庸底干治。

初王曾罷相。知青州。徙天雄軍。拜彰德軍節度使。魏民愛其政。生祠之。改鎮天平軍。同平章事。判河南府。始陳堯咨與曾有隙。曾實代堯咨於天雄。政有不便者。徐更之。彌縫不見其迹。及去堯咨。復繼。曾後見府署及什器。皆堯咨舊規。但完葺。無所改歎。曰。王公宜其爲宰相。我度量誠

不及也。是年復召爲樞相。曾入樞府。數月二年

二月再相

景祐二年

乙亥

二月戊辰李迪罷相

授刑部尚書知亳州

制曰。朕統臨寰區。審求輔相。儻或招於物議。難久處

於台司。宜告在廷。俾從罷秩。具官李迪。蚤逢昌會。式展嘉

猷。嘗參護於儲宮。遂延登於政路。而乃姻聯之內。險

詐相朋。靡先事而正言。頗爲臣而有隱。豈可更居家

職。以肅朝章。且出守於便藩。猶加榮於憲部。仍陪多

賦。以禮舊臣。於戲。其代天工。當絕近私之蔽。乃心王

室母懷去位之嫌往而省思尚克祗服

迪自明道二年四月再入相是年二月罷為相
僅二年○明道二年宰相李迪除二人為臺官
張滉為侍御史韓瀆為殿中侍御史言者謂臺
官必由中旨乃祖宗法也既數月呂夷簡復入
因議其事於上前上曰祖宗法不可廢也宰相
自用臺官則宰相過失無敢言者矣迪等皆皇
恐遂出滉瀆並知州詔自今臺官有關非中丞
知雜保薦者毋得除授張○景祐元年中書言
太常博士李東之先於學士院試賜同進士出

身館閣校勘詔除集賢院知邢州東之迪之子
也天禧末迪罷相斥逐東之洛職迪復相東之
自陳於政府奏乞檢會乃有是命議者非之或
曰迪與呂夷簡同相迪直而疎夷簡巧而密迪
常有所規畫夷簡覺非迪所能乃問迪所親曰
復古門下誰適與謀對以李無門客獨東之慮
事過其父遠甚夷簡因謂迪曰東之才可用當
付以事迪謙不敢當夷簡曰進用才能自夷簡
事幸勿預知卽具奏得請迪父子皆喜不悟夷
簡陰奪其謀主也東之既受命居半歲迪果罷

相同是年二月迪罷爲刑部尚書知亳州先是
上御延和殿召宰相呂夷簡叅政宋綬決范諷
獄以宰相李迪雅善諷素黨諷不召迪皇恐還
第翼日遂罷相制詞畧曰姻聯之內險詐相朋
靡先事而正言頗爲臣而有隱然迥性淳直實
不察諷之多誕也未幾改知相州復改授資政
殿大學士兼翰林侍讀學士留京師仍班三司
使上同迪罷相後三日除叅學兼侍讀留京師
後十日降爲太常卿知密州始迪再入相自以
受不世之遇盡心輔佐知無不爲及呂夷簡繼

入中書頗專制心忌迪潛短之于上迪性直而
踈不悟也既坐范諷姻黨罷政怨夷簡因奏夷
簡私交荆王元儼嘗爲補門下僧惠清爲守闕
鑿義夷簡請辨上遣知制誥胥偃卽訊乃迪在
中書時所行夷簡以齋祠不預迪慚懼待罪故
貶然補惠清實夷簡意迪但行文書顧謂夷簡
前獨私荆王盖迪偶忘之它日語人曰吾自以
爲宋璟而以夷簡爲姚崇不知其待我乃如是
也長○康定元年資政殿學士戶部尚書李迪
爲彰信軍節度知天雄軍自元昊反武事久弛

守將或爲他名以避兵任迪欲守邊詔不許然甚壯其意呂夷簡自天雄復入相卽命代之後以太子太傅致仕慶曆七年卒年七十七贈司空侍中謚文定帝篆其墓曰遺直之碑○先是知制誥李淑上十議其四議大臣曰太祖定天下用周朝三相猶六年始以趙普代之凡十一年三相實五年普實十年始以薛居正沈倫代之太宗嗣位惟一相盧多遜又六年而用趙普自後十八年中雖三四易相然所用者惟李昉宋琪呂蒙正張齊賢呂端五人當是時進者競於納忠退

則懼而脩省蓋進退宰相皆出睿斷也真宗景德以前三次遷改惟李沆向敏中王旦畢士安寇準而已其任王旦十二年次則向敏中再相亦十年此二人在位之日非無疑似之說以大度拜容推任無間而不重以權故也且權太重則臣下難於久居言易入則小人得以交鬪議在

景祐元年今附李迪罷相後

同日王曾右僕射

自樞密使行吏部尚書檢校太師同平章事集賢殿大學士再入相

制曰樞謨靖密所以制乎邊兵罪僇變和所以均乎國政維是文武之柄屬在股肱之良爰擇剛辰以敷

大號具官王曾性資端亮器識淵冲蔚為英材克對休運

蹈夷險之一致厲夙宵之素勤泰階六符重昭於天

象尚書百揆式總於民常進書殿之美名益爰田之

多賦茲為異寵寔副僉言於戲萬微之繁非腹心而

罔寄四隣之近蓋體貌之所加維乃協恭副予圖舊

曾自真宗乾興元年七月拜相至仁宗天聖七

年六月罷是年復自樞密使再入相南郊畢封

沂國公

同日王隨李諮並樞密院事

隨自參知政事遷吏部侍郎除諮自樞密副

王德用韓億並同知樞密院事

德用自樞密副使檢校太保遷奉國留後

除億自御史中丞戶部侍郎除

蔡齊盛度並參知政事齊自樞密副使給事中遷禮部侍郎除度自翰林學士

承旨端明殿學士兼翰林侍讀學士禮部侍郎除

億字宗魏開封雍丘人度字公量杭州餘杭人

○隨執政三年至四年四月拜相○諮在樞府

踰三年至景祐三年二月卒仁宗幸其第臨奠

輟視朝贈尚書右僕射謚獻成裕性明辨周知

世務其處煩常若閒暇吏不敢欺在樞府專務

革濫賞以遏僥倖其戎馬功簿之目能悉數上

前號爲稱職

景祐三年 丙子

十二月王德用知樞密院事

自奉國留後同知樞密院事除

章得象同知樞密院事

自翰林學士承旨兼侍讀學士龍圖閣直學士禮部侍郎除

得象字希言世居泉州得象爲人莊重度量恢廓初爲楊億所稱以爲有公輔器或問之答曰閩士多輕狹而得象渾厚有容此所以貴也在翰林十二年怡然自得莊獻太后臨朝宦官熾橫太后每遣內侍至學士院得象必正色嚴待之或不交一言議者以此稱焉位樞府三年至

五年三月拜相

景祐四年 丁丑

四月甲子呂夷簡王曾並罷相

夷簡授檢校太師同平章事充鎮安軍節

度使判許州

曾授尚書左僕射充資政殿大學士判鄆州

宋綬蔡齊並罷叅知政事

綬自吏部侍郎罷爲尚書左丞資政殿學士

夷簡罷相判許州制曰持衡宰路以裁萬化之宜授

節齋壇以總元戎之畧豈出入之有異蓋勞逸之是

均爰擇剛辰誕告列位

具官呂夷簡

黃中通理明允篤誠

克肩一心以廣庶績佐時論道十有六年頃從价藩

還冠台席方茲倚賴同底治平而歲期之間曩封十

上願解要劇以圖安便宜加將鉞之崇兼視師垣之
貴褒功益賦叢示寵休於戲中外迭居莫如將相之
重終始一節實契君臣之知勉率訓詞益宣令聞
曾罷相判鄆州制曰朕紹膺丕構統御庶邦周覽萬
機之繁並建四輔之職其有久任國事屢奏囊封宜
解近司用昭美志具官王曾誠存方恪識蘊精微感遇先
朝踐揚膺仕逮續承於天緒尋擢正於台衡實賴嘉
謀共熙庶績碩閱勞於政路宜均逸於藩符進長中
臺之班兼榮祕殿之職褒功易號疏邑陪封式是茂
恩以復優顧於戲儀刑百辟協宣左右之勞體貌大

臣務全進退之禮往祗明命姑狗私懷

夷簡自明道二年十月復相至是年四月罷入
相踰三年曾自景祐二年二月復相至是年罷
入相九二年○天聖中曾爲首相夷簡參政事
曾甚謹曾力薦夷簡爲亞相未幾曾罷夷簡爲
首相居五年罷不半歲復位李迪爲次相與夷
簡不協夷簡欲傾迪乃援曾入使樞密不半歲
迪罷曾卽代之始曾久外有復入意宋綬實爲
曾達意於夷簡夷簡卽奏召曾及將以曾代迪
綬謂夷簡曰孝先於公事契不薄宜善待之勿

綱目錄
卷之四
如復古也夷簡笑諾其言綏曰公已位昭文處
孝先於集賢可也夷簡曰不然吾雖少下之何
害遂請用曾可首相帝不可乃爲亞相旣而夷
簡專決事不少讓曾不能堪議論多不合曾數
求去夷簡亦累丐罷帝疑焉問曾曰卿亦有所
不足耶曾言夷簡招權市恩時外傳夷簡納知
秦州王繼明饋賂曾因及之帝詰夷簡至交對
帝前夷簡請置對而曾言亦有失實者帝不悅
綏素與夷簡善齊議事間附曾二人各有所比
故併綏齊皆罷初命曾以左僕射知青州旣入

謝求改鄆州乃下學士院貼麻加資政殿大學
士判鄆州蓋僕射典州當云判不當云知翰林
學士丁度失之也長編○天章閣待制權知開封

府范仲淹言事無所避大臣權倖多忌之時呂
夷簡執政進者往往出其門仲淹言官人之法
人主當知其遲速升降之序其進退近臣不宜
全委宰相又上百官圖指其次第曰如此爲序
遷如此爲不次如此則公如此則私不可不察
也夷簡滋不悅仲淹又言漢成帝信張禹不疑
舅家故有王莽之亂臣恐今日朝廷亦有張禹

壞陛下家法以大爲小以易爲難以未成爲已
成以急務爲閑務者不可不早辨也夷簡大怒
與仲淹辨於帝前且訴仲淹越職言事荐引朋
黨遂貶仲淹落職知饒州至是夷簡亦罷同上○
綬自明道二年十月除叅知政事是月同罷執
政踰二年仍留侍講筵權尚書都省齊亦自明
道二年十月除樞密副使景祐二年二月除叅
知政事是月同罷執政踰二年綬坐與夷簡善
曾坐與齊善曾既罷相齊亦歸班云

同日王隨陳堯佐並拜相

隨自部侍郎知樞密院事
堯佐自知鄭州授依
檢門下侍郎同平章事昭

文館大學士監修國史堯佐自知鄭州授依
前戶部侍郎同平章事集賢殿大學士
隨昭文相制曰朕惟萬微之務屬乎三事之臣必疇

咨于老成可變輔於元化誕揚丕制敷告明廷具官
王隨

素履含章純誠格物受知先帝早踐禁途輔德中人

寔勞儲邸旋叅政論復總樞謀屢詢黃髮之言彌見

素絲之節是用擢司邦柄進代天工兼榮史觀之華

加食爰田之賦維時寵數盖協師僉於戲周以申伯

揉萬邦漢以魏相總衆職著于載籍屬在良臣爾其

變調陰陽鎮撫夷夏作我良弼不其偉歟

堯佐集賢相制曰朕纂紹丕圖謚寧中夏審求時宰

付畀國鈞惟是老成之才允茲枚卜之吉誕揚明命
敷告群倫具官陳堯佐望重朝端遠猷經世出入中外勤
勞夙宵二府告猷居稔忱恂之德大邦賦政固多愷
悌之風是用擢正階符參調鼎味羔榮書殿之職重
錫雲臺之名采地真封併加異數於戲師尹之重式
副民之具瞻股肱之良允謂國之同體祗服厥位勿
替乃誠

隨加門下侍郎堯佐守本官呂夷簡嘗密荐二
人可用故也自薛居正後初相無越遷門下侍
郎者丁度始誤草制因不復改

同日盛度知樞密院事

自禮部侍郎參知政事除

韓億程琳石中立並參知政事

億自工部侍郎同知樞密院事除琳自

三司使吏部侍郎除中立自翰林學士承旨

王駿同知樞密院事

自樞密直學士左司郎中遷右

琳字天球永寧軍博野人中立字表臣樞密使

石熙載之子駿字揔之趙州臨城人○度以寶

元元年三月自戶部侍郎知樞密院事加武寧

節度使檢校太傅度位本居章得象上而得象

超爲宰相故度亦特進秩○琳舉服勤詞學科

中選召試除直集賢院是年除參知政事

寶元元年

戊寅

五年十一月改元

三月戊戌王隨陳堯佐並罷相

隨授太傅同平章判充彰信軍節度使荆

河陽

堯佐授檢校太傅同平章事充淮康軍節度使判鄭州

韓億石中立並罷叅知政事

億自戶部侍郎罷歸本班中立自禮部侍郎

罷爲戶部侍郎資政殿學士

隨罷相建節制曰秉鈞之府既諮上宰之謀經武之方亦仗元戎之略式頒明制誕告外廷具隨器業宏深才猷敏達自贊襄於袞職旋總領於星樞簡于朕懷付以魁柄繇厲精而宣力久結疾以愆和疊上奏函懇辭政路謙徽滋至夷退可嘉靡容機務之煩重

勞著舊之德是用擇于近屏建以高牙兼榮台鉉之司仍視師臣之秩於戲辭隆釋重聊遂於素懷味道養恬勉綏於吉履祗服渥命益宣令猷

堯佐罷相建節判鄭州制曰亮采奮庸方委持衡之

重避榮遜寵宜推從欲之私誕舉徽章字告列位具

陳堯 仲和挺質懿厚修身視履存乎時中力學探乎

古始內外更踐滯榮相叅間自近司出臨巨屏載圖舊德擢正中階協調台鼎之和對掌神機之務遽因災異繼有奏陳援漢家賜策之文狗申伯于蕃之志屢形詔諭固執確衷仍躡寵於齊壇俾兼榮於將紱

陪京右地姑以優賢於戲君子得進退之宜用符於
終吉大臣無出處之間要盡於一心往阜吾民實均
予倚

隨自景祐四年四月拜相是年二月罷陳堯佐
與隨同時拜相是歲俱罷入相僅二年億自景
祐二年二月除同知樞密院事四年四月除叅
知政事至是同罷執政不及一年○初夷簡罷
密薦隨與堯佐二人爲相其意引援非才居已
下者用之覲他目上意見思而復相已及隨與
堯佐億中立等議政數忿爭於中書隨尋屬疾

在告詔五日一朝日赴中書視事而堯佐復年
高事多不舉時有中書番爲養病坊之語會災
異仍見韓琦論隨等疏九上堯佐亦先自援
漢故事求策免於是四人俱罷錫長時災異數見

王隨陳堯佐爲相以疾五日一朝數忿爭叅政
韓億多私石中立好戲詭右司諫韓琦連疏論
其過曰陛下用輔臣如此外夷聞之亦有輕視
中國之意望天災之消恐不可得於是四人者
同日罷上同○寶元二年彰信節度使同平章事

王隨卒贈中書令謚文惠始隨叅知政事請與

同列日獻前代名臣規諫一事以廣聞聽議者謂非輔弼之職其事遂寢及至居相位多屬疾益無所建明外若方嚴而治失於寬

編長

○中立

以太子少師致仕皇祐二年中立卒年七十八贈太子太傅謚文定中立性踈曠好諧諠及參大政或諫止之中立曰詔書云餘如故安可改人傳以爲笑談練習臺閣故事不及汲近名云

同日張士遜章得象拜相

士遜自山南東道節度使檢校太師同平章事判河

南府授行門下侍郎兼兵部尚書同平章事判河文館大學士監脩國史三入相得象自戶部侍郎同知樞密院事依前行戶部侍郎同平章事集賢殿大學士

士遜昭文相制曰鼎寶調元蓋專國政台星著象式

煥天光矧予碩臣時乃舊德宜入持於魁柄用大副

於群瞻

具官張士遜

夷粹含章中庸體道懋昭一德之美

協贊萬幾之徵頃自家司往登太室澄清俗化敦厚時風若歲之和汝惟霖雨之潤如堂之庇汝惟棟幹之良是用還司上台進位左省兼領夏卿之峻仍專史觀之華褒功賦田並躡彘數於戲代天之化以布氣於四時秉國之鈞以至宰於萬事勉勤猷念庸副

卷求

得象集賢相制曰朕躬履邦圖厲精治本叅贊萬微

之務遯求四近之賢矧對掌於大鈞必允符於枚卜
登我碩輔告于明廷具官章得象冲簡直溫懿厚和粹高
文見于典冊茂行涵于珪璋頃由禁林進筮樞極謹
重之望可以表儀朝倫經綸之才可以緝熙皇化爰
立作相永孚于休於戲斷自朕心固僉謀之罔間協
于一德豈盛業之難圖若時老成奚俟深訓

士遜自明道元年二月拜相二年十月罷再入
相凡二年除山南道東節度使同平章事改判
陳州徙河南呂夷簡罷相仁宗用王隨陳堯佐
爲相明年隨堯佐罷士遜復拜相封郢國公○

初韓琦數言執政非才上未卽聽琦又言曰豈
陛下擇輔弼未得其人故耶若枉行孔道輔胥
偃宋郊范仲淹衆以爲忠正之臣可備進擢不
然嘗所用者王曾呂夷簡蔡齊宋綬亦人所屬
望何不圖任也上雖聽琦罷王隨等更命士遜
及得象士遜入謝猶以東宮舊恩或又言夷簡
密薦之得象入謝上謂曰往者太后臨朝群臣
邪正朕皆嘿識惟卿清忠無所附且未嘗有干
請今日用卿由此長緇

同日王巖李若谷並叅知政事巖自有諫議大夫同知樞密院事除若

谷自龍圖閣直學士工部侍郎
權知開封府除

王博文陳執中並同知樞密院事

博文自龍圖閣直學士給事中權三

司使除執中自龍圖閣直學士工部郎中知永興軍遷右諫議大夫除

若谷字子淵徐州豐人博文字仲明曹州濟陰

人執中字昭譽恕之子○王博文與陳執中並

命位樞密凡三十六日卒車駕幸其第臨奠輟

視朝贈吏部侍郎子疇英宗時樞密副使在位

五十五日而卒

四月乙亥張觀同知樞密院事

觀字思正絳州人中服勤詞學科擢為第一觀

以給事中權御史中丞舉文彥博為御史時以

為得人博文卒遂有是除帝初論中書候兩府

闕官則用宋庠及王博文卒中書以庠名進上

曰張觀先朝狀元會用觀也時上遇庠厚翰林

士李淑實中之

寶元二年巳卯

五月壬子王德用罷知樞密院事

自宣徽南院使定國軍節度使罷為

武寧軍節度使赴本鎮

德用自明道二年除簽書樞密院事十月除樞

密副使景祐二年二月除同知樞密院事三年

十二月除知樞密院事是年五月罷相樞府六年○德用狀貌雄毅面黑而頸以下白哲人皆異之其第在泰寧坊直宮城北隅開封府推官蘇紳嘗疏德用宅枕乾崗貌類藝祖帝匿其疏不下御史中丞孔道輔繼言之語與紳同且謂德用得志不宜又典機密罷爲武寧軍節度使赴本鎮德用尋以居第獻詔隸芳林園給其直緡^長初德用旣以孔道輔言罷知樞密院而河東樞密使王汾又言德用嘗令府州折繼宣市馬至是德用以馬與券來上乃市於商人然尤用

言者而再貶之是歲德用自武寧節度使降爲右千牛衛上將軍知隨州仍特置判官一員家人皆皇恐而德用舉止言色如平時但不接賓客而已^{上同}康定元年徙知隨州右千牛衛上將軍王德用知曹州道過許州梅詢謂德用曰道輔害公者今死矣德用曰孔中丞以其職言豈害德用者朝廷亡忠臣可惜也

同日夏守贇同知樞密院事

守贇拜州榆次人自鎮海軍節度使除班陳執中上李若谷下守贇時爲真定府部署召用之

十一月丁酉盛度罷知樞密院事自武寧軍節度使罷為尚書右丞知揚州

程琳罷叅知政事自尚書左丞罷為光祿卿知潁州

度自景祐二年二月除叅知政事四年四月除

知樞密院事是年十一月罷執政踰四年琳自

景祐四年四月除叅知政事至是同罷執政踰

二年○初張士遜素惡琳而疾御史中丞孔道

輔不附已將侮逐二人察帝有不悅琳意即給

道輔上頌程公厚今為小人所誣宜見上為辨

之特度乘高勢以侵占民居琳嘗尹京邑以巧

譎市第道輔入對言琳罪薄不足深治帝果怒

以道輔朋附大臣特貶為給事中知鄆州道輔

後知士遜賣已憤而卒然天下皆以遺直許之

長嘉祐元年鎮安節度使同平章事程琳卒琳

編既歸本鎮遽卒贈中書令謚文簡琳為人敏厲

嚴深長於政事章獻時嘗上武后臨朝圖外人

莫知帝後於邇英講讀謂近臣曰琳心行不佳

益指此也然琳卒蒙大用出入將相幾二十年

議者謂上性寬厚無宿怨云同上

壬寅王醜知樞密院事自右諫議大夫叅知政事遷工部侍郎除

同日宋庠叅知政事自刑部員外郎叅知政事遷諫議大夫除

庠字公序開封雍丘人舉進士開封禮部俱第一與弟祁同時有名以詩賦爲學者所宗謂之二宋初名郊累遷刑部員外郎知制誥上欲以爲右諫議大夫同知樞密院事中書言故事無知制誥爲執政者乃先召入翰林學士左右知上遇郊厚行且大任矣學士李淑害其寵欲以奇中之因言郊姓名不祥上以諭郊因改名庠初諭中書候兩府闕官則用宋庠及王博文卒中書以庠名進上乃先用張觀蓋諧者之說已行然帝遇庠厚卒用之至是遂拜叅知政事

長編

○故事無知制誥除執政者必先除翰林

康定元年

庚辰

三年二月改元

二月丙午夏守贊罷同知樞密院事

除宣徽南院使陝西經畧緣邊

招討使

制曰宣猷之地蓋倚舊勞之臣制閫之權是圖雄俊之帥念保邦之維憲方講事以治戎宜峻使各外恢王略具官夏守贊精剛不撓沉毅有謀早會先朝寢聽禁籍入則董材官之旅以衛殿廬出則建上將之牙以臨方社自擢陪於密務彌進厲於深忠屬興夷落之虞日奏邊烽之急再思平殄須賴鎮安肅改秩於內

徽易褒功之美號往臨關輔式遏寇戎於戲職在樞
機稔聞於碩畫賜之斧鉞特仗於專征惟嚴明可以
統師惟威武可以懾敵欽予訓命遲乃膚功

守贊自寶元二年五月除知樞密院事在樞府
不及一年會西邊用兵守贊自請討賊故有是
命仍命御藥張德明等掌御劔隨之時以內侍
王守忠爲都鈐轄知諫院富弼三司使晏殊各
請罷內臣監兵云

三月戊寅王醜罷知樞密院事自工部侍郎罷知河
南府兼西京留守
陳執中張觀並罷同知樞密院事執中自右諫議大
夫罷知青州觀自

給事中罷
知相州

醜自景祐四年四月除同知樞密院事五年三
月除叅知政事寶元二年十一月除知樞密院
事是年三月罷在政府僅三年執中自景祐五
年三月除同知樞密院事是月同罷在樞府九
二年觀自景祐五年四月除同知樞密院事是
月同罷在樞府僅二年○天聖中醜嘗使河北
過真定見曹瑋謂曰君異日當柄用願留意
邊防醜曰何以教之瑋曰吾聞趙元昊頗傑悍
狀貌異常他日必爲邊患醜時莫究所謂比再

入樞密院元昊果叛帝數問邊計不能對及劉

平石元孫等敗議刺鄉兵久不決帝不悅宰臣

張士遜言軍旅之事樞密院當任其咎於是黜

及執中觀三人同日罷黜乃思瑋言長編

同日晏殊宋綬並知樞密院事殊自三司使刑部尚書除綬自資政殿大

學士禮部尚書知河南府除

王貽永同知樞密院事自保寧軍節度使檢校太傅

詔叅知政事同議邊事仍書檢從知樞密院事

晏殊之請也詔中書別置廳與樞密議邊事遂

置廳與樞密院之南帝初以手詔賜大臣居外

者詢攻守之略綬在河南畫十策以獻于是復

召之與殊及貽永同覓樞密長編○貽永字秀長

宰相王溥之孫

五月壬戌宰相張士遜拜太傅鄧國公致仕自行門下符郎

兼兵部尚書同平章事檢太傅致仕進封鄧國公

制曰秉鈞當國進以儀於官師告老于朝退以厚於

風俗去就以禮古今所難宜推高懷誕布列位具官張士

遜志尚恬約器涵冲深逮事朝叅輔朱邸忠嘉一

節夙夜無渝尊命樞庭謹翊萬微之要調元宰路翕

宣庶政之和乃懇土於印章願退休於田里載旌茂

節以侈寵光用正師臣之班仍恢國土之非歲時之
會朔望以朝恩數便蕃實出朕意於戲功成身退蓋
本道家之常憲老乞言尚希惇史之益往綏德履俾
介壽祺

士遜自景祐五年三月拜相至是年五月罷凡
三入相僅三年○時二邊用兵詔樞密院自今
邊事並與宰相張士遜章得象參議之卽不須
簽檢國朝舊例以中書制民樞密主兵故元昊
反邊奏皆不關中書翰林學士丁度嘗建言古
之號令必出於一今二府分兵民之政若措置

乖異則天下無適從非國體也請軍旅重務二
府得通議之知諫院富弼又言邊事係國安危
不當專委樞密院而宰相不與乞如國初令宰
相兼樞密使上叅取其言而除是詔士遜等以
詔納上前曰恐樞密院謂臣等奪權弼曰此宰
相避事爾非畏奪權也時西蕃酋領各稱僞將
相來降詔補三班奉職借職羈置湖南弼言二
人之降其家已誅夷當厚賞以勸來者上命以
所言送中書而宰相初不知也弼歎曰此豈小
事而宰相不知耶更極論之士遜乃不敢辭

時軍興機務填委士遜位首相無所祐諫官以
 為言士遜不自安七上章請老又數面陳優拜
 太傅遂封鄧國公致仕聽朔望大朝會綴中書
 門下五月給宰臣俸三之一出入施繖及與一
 子五品服士遜乞免朔望從之本朝以宰相
 得謝者自士
 遜時議欲揀輦官為禁軍於是輦官自詎待漏
 院士遜上馬將朝諠譟益甚遜道不進馬驚墜
 地士遜乃七上章請老故優禮之并罷錄皇祐元
 年太傅致仕鄧國公張士遜卒士遜就第十年
 卒年八十六車駕臨奠翼日謂輔臣曰昨有言

庚戌是朕本命不宜臨喪朕以師臣之舊故不
 避文彥博曰唐太宗辰日哭張公謹陛下過之
 遠矣贈太師中書令謚文懿○士遜惡叅知政
 事程琳多異議御史中丞孔道輔不附已欲併
 逐之遂以計去之仁宗疑其朋黨琳及道輔俱
 被黜然士遜為人實厚亦有過人者一日仁宗
 語士遜曰人言范仲淹嘗欲乞廢朕朕但未見
 其章疏爾士遜曰陛下既未見其章疏不可以
 空言加罪望陛下訪之積十數請仁宗曰竟未
 之見也然為朕言之者多矣士遜力為辨其不

然仁宗意乃解

同日呂夷簡石僕射

自鎮安軍節度使檢校太師同平章事判天雄軍授右僕射兼

門下侍郎同平章事昭文館大學士監修國史

制曰王者設丞疑之臣同股肱之體出宣風化以偃

佞人之藩入總機猷以儀朝宰之位載符枚卜誕告

明廷

真官品夷簡

體涵中和性尚敦一器更大用勲著一

時內外必平有魏絳之風烈夙夜匪懈維山甫之將

明國之老臣世所標準是宜解旌纛之權于外專鼎

鼐之職于中榮還右揆之崇峻兼左輔之重屬戎舊

德合于衆謀於戲代天之工注意于相肯祥屢見則

消復之是圖疆場未寧則攻守之是許爾其變陰陽

以導善氣成感懷以鎮四夷勉而忠勞紆我宵旰

六月乙亥夏守贊同知樞密院事

自宣徽南院使鎮海節度使除

八月戊午罷為天平節度使判澶州再入樞府

僅兩月○初守贊為招討使性本庸怯寡方畧

不為士卒所附尋詔駐軍河中府居數月又徙

屯鄜州乃以其子隨為陝西緣邊招討使復授

守贊同知樞密院隨既道卒守贊遂請罷去

錄初置集賢院富弼言守贊庸人平時猶不能

用况艱難之際可為樞密乎用之為天下笑侍

御史趙及等亦言守贊經略西事無功不可復處樞府踰七旬而罷尋卒贈太尉謚忠信

八月戊申杜衍同知樞密院事自龍圖直學士刑部侍郎權知開封府除

衍字世昌越州會稽人

九月戊午李若谷罷叅知政事馬資政殿大學士吏部侍郎提舉會靈觀

事○宮觀置提舉自李若谷始

若谷自景祐五年三月除叅知政事是年九月

罷執政踰二年若谷以耳疾累章辭位故有是

命明年告老以太子少傅致仕卒年八十贈太

子太傅謚唐靖

同日宋綬晁宗愨並叅知政事綬自知樞密院事遷

自起復翰林學士兼龍圖閣學士左司郎中知制誥遷左諫議大夫除

綬既拜叅政府不視事遂卒仁宗幸其第臨奠

輟視朝贈司徒兼侍中謚宣獻綬自康定元年

三月除知樞密院事是年九月除叅知政事十

二月卒再執政不及一年綬性孝謹清介博通

經史百家之書爲一時所尚朝廷有大議論多

所裁定楊億嘗稱其文沉壯淳麗尤善鋪賦吾

不及也編長○宗愨字世良澶州清豐人翰林學

士承旨迥之子也

同日鄭戩同知樞密院事

自起居舍人權三司使遷右諫議大人除

戩字天休蘇州吳縣人

戊辰晏殊樞密院使

自知樞密院事遷檢校太傅依前行刑部尚書除

王貽永杜衍鄭戩並樞密副使

貽永自同知樞密院事駙馬都尉除

自刑部侍郎同知樞密院事除

戩自右諫議大夫同知樞密院事除

殊除樞密使制曰上樞之地皇武是經本喉舌之司

為股肱之體顧僉諧於朝論特寵建於使名乃揆良

辰誕頒明制

具官晏華

純誠端固敏識沉通詞掞人文之

華道資天爵之富被知先帝輔學冲入入贊二司釐

敷邦畫出臨方面洽著民聲再持憲綱更摠利柄乃

眷舊臣之望荐膺右府之資帷幄賴於嘉謀措紳服

其全德宜正本兵之府且昭與國之忠衍邑加封併

蕃異數於職佐時展用經國須材匪肩忠瘁之誠曷

濟機微之務往服休命無忘欽哉

貽永慶曆三年三月除宣徽南院使○衍慶曆

二年三月為河東宣撫使

慶曆元年

辛巳 康定二年十一月改元

五月辛未宋庠罷叅知政事

自右諫議大夫守本官出知揚州

鄭戩罷樞密副使

自右諫議大夫除資政殿學士知杭州

庠自寶元二年十一月除叅知政事是年五月

罷執政踰一年戢自康定元年九月除同知樞密院事尋改除樞密副使是月同罷在樞府不及一年○先是呂夷簡當國同列不敢預事唯詔書紙尾而已獨庠數與爭論夷簡不悅上顧庠頗厚夷簡忌之求所以傾庠未得及范仲淹擅通書元昊又焚其報夷簡從容語庠曰人臣無外交希文何敢如此庠以夷簡誠深罪仲淹也他日於上前議其事庠遽請斬仲淹樞密副使杜衍力言其不可庠謂夷簡必助已而夷簡終無一言上問夷簡夷簡徐曰杜衍之言是也

止可薄責而已上從之庠雖倉皇失措論者喧然皆咎庠然不知實為夷簡所賣於是用朋黨事與戢俱罷時西北數屾上憂之欲遣輔臣戢請行不許長編○權三司使葉清臣權知開封府

吳遵路二人雅相厚而宋庠鄭戢皆同年進士也二人並據要地銳於作事宰相以為朋黨請

俱出之於是四人皆與郡庠知揚州戢知杭州

同日王舉正叅知政事

自翰林學士兵部郎中知制誥遷右諫議大夫除

舉正字伯中叅政王化基之子也舉正累遷翰

林學士前一夕吏有報除叅知政事舉正方燕

居齋舍徐謂吏曰傳者必妄不然安得漏禁中語既入謝上曰卿恬於進取未嘗干朝廷以私故不次用卿又顧謂王舉正曰卿世爲叅知政事可謂榮矣長編

同日任中師任布並樞密副使

中師自樞密直學士右諫議大夫知益州

召遷給事中除

布自龍圖閣直學士給事中

中師字祖聖叅知政事中立之弟布字應之河南人後唐宰相圜四世孫○先事布數上書論事帝欲用之呂夷簡薦中師才不在布下遂俱擢任或曰中師罷廣嘗納賂於夷簡於是樞密

副使闕上謂夷簡曰用諫議大夫任姓者蓋指布也夷簡遽進中師名上徐曰今在西川夷簡因言中師可用仍併用兩人續○三年七月中師除河東宣諭使

慶曆二年壬午

三月辛酉晁宗慤罷叅知政事

自右諫議大夫授資政殿學士給事中

宗慤康定元年除叅知政事是年三月從祠南郊感疾數求罷故有是命執政踰二年未幾而卒贈工部尚書謚文莊宗慤性篤厚凡任子恩皆先其族人

七月丙午任布罷樞密副使自給事中除工部侍郎知河陽

布自慶曆元年五月除樞密副使至是年七月

罷在樞府一年拜罷錄作三月任布在樞密純約自守

無所補然數與宰相呂夷簡忤夷簡惡之布遂

罷去

戊午宰相呂夷簡判樞密院事自尚書左僕射兼門下侍郎同平章事

文館大學士監脩國史許國公授依前官判樞密院事

章得象兼樞密使自行戶部侍郎同平章事充集賢殿大學士兼樞密使

樞密使晏殊同平章事自樞密使授檢校太尉依前行刑部尚書同平章事

夷簡判樞密院事制曰王者崇建上宰統理萬微以

變調於陰陽以鎮撫於夷狄近世兵事一委樞庭分

設攸司不統公府屬邊烽之尚警思妙略之協宣宜

委老成使之兼領具官呂夷簡中庸載德沉密體和夙以

英才列於政路諳求賢濟治之要知尊主馭下之方

自正元台寔登庶績今倚睿哲兼司武經以專二府

之謀以靖三陲之警爰田加食併示徽章於戲歷考

前王統御諸夏或簫勺以清群慝或干羽而來遠人

匪徂兵威務恢王度維乃碩輔博通舊文富有遠圖

以副朕意

得象兼樞密制曰朕祗紹丕圖勤求至治永惟上皇

之道爰立輔相之官鎮撫四夷宰制群類而茲疆場之事乃專樞宥之司非通筦於冢卿曷統一于機務具官章懿文華國深識造神寬裕表於性情誠明彰得象于術業矧夫密勿之地本總綏於四夷弼偕之臣固倚平於萬事宜正使名之重以符邦棟之隆實賦爰田併伸褒異於戲政有未允資黃髮之謀知無不爲更勵素絲之節往服休命勿忘欽哉

殊拜樞相制曰帝王之業非一士之所成兵農之方豈異途而可治故總合二府之制叅寄群賢之謀式旌舊臣以告列位具官晏殊器懷端裕業履純深學探聖

人之原文經天下之化朕昔在藩邸早聞政幾嘗延賓友之良獲親道義之益肆纂宏緒俾服大僚顧樞筦之本兵方帷幄之計事且慮衆則勢必審任則重責亦深宜視秩於上司特進班於時宰爰田真食惟寵之將於戲邦化未孚虜情弗諱阜民經物旣濟以臯夔之功制勝伐謀又申以良平之畫終佇成績用恢遠圖

初諫院張方平言朝廷政令之所出在中書若樞密院則古無有也蓋起於後唐權宜之制而事柄遂與中書均分軍民爲二體列文武爲兩

途為政多門自古所患乞廢樞密院或重於改
 作則請併本院職事于中書亦足以一政事之
 本通賞罰之權不報編長初富弼建議宰相兼權
 樞密使上曰軍國之務當悉歸中書樞密非古
 官然未欲遽廢故止令中書同議樞密院事及
 張方平請廢樞密院上乃追用弼議特降制命
 夷簡判院事而得象兼使殊同平章事為使如
 故○初命宰臣呂夷簡判樞密院事既宣制黃
 霧四塞風霾終日朝論甚喧叅政王舉正言二
 府體均判名太重不可不避也右正言田况復

以為言夷簡不敢當改兼樞密使九月制罷判
 樞密院除兼樞密使並同○殊自康定元年三
 月除知樞密院事九月除樞密使是年七月除
 同平章事充樞密使再執政凡三年至三年三
 月拜相

宋宰輔編年錄卷之四終
大梁梓人楊國俊寫

